

四庫全書

集部

欽定四庫全書

集部  
御選歷代詩餘卷七十四

詳校官中書<sub>臣</sub>潘有為

侍讀<sub>臣</sub>孫球覆勘

總校官進士<sub>臣</sub>朱鈐

校對官中書<sub>臣</sub>徐秉敬

謄錄監生<sub>臣</sub>張士琛

欽定四庫全書

御選歷代詩餘卷七十四目錄

一百  
二字

水龍吟

上

柳永

蘇軾

四首

秦觀

晁補之

四首

李之儀

章藻

孔平仲

孔武仲

二首

周紫芝

二首

周邦彥

晁端禮

李祁

呂渭老

二首

向子諲

葉夢得

李綱  
二首

曾覲

楊无咎  
三首

侯寘

辛棄疾  
七首

韓元吉

袁去華

劉克莊

四首

趙彥端

管鑑

陳亮

黃機

馬莊父

劉鎮

嚴仁 三首

毛玨

盧祖皋 二首

高觀國

史達祖 三首

方岳 二首

御選歷代詩餘卷七十四目錄



欽定四庫全書

御選歷代詩餘卷七十四

一百二字

司經局洗馬掌局事兼翰林院修撰加二級臣王奕清奉

旨校刊

水龍吟

上

雙調一百二字一名小樓連苑一名海天闊處皆以詞句別名也

水龍吟

梅

柳永

雪霏冰結霜凝是誰透得春工意南枝向暖江邊嶺上

獨先衆卉閒態幽姿綠窻紅葦粉英金蕊念冰膚秀骨  
人間要見除非是真仙子 羌管且休橫吹待佳人新  
妝初試鸞臺晚鑑人花相對何須更比疎影橫斜暗香  
浮動月低風細又豈知漸結枝頭翠玉有和羹美

前調

蘇軾

古來雲海茫茫蓬山絳闕知何處人間自有赤城居士  
龍蟠鳳舉清淨無為坐忘遺照八篇奇語向玉霄東望  
蓬萊曉靄有雲駕驂風馭 行盡九州四海笑紛紛落

花飛絮臨江一見謫仙風采無言心許八表神遊浩然  
相對酒酣箕踞待垂天賦就騎鯨路穩約相將去

前調

贈吹笛  
侍兒

蘇軾

楚山修竹如雲異材秀出千林表龍鬚半翦鳳膺微漲  
玉肌勻繞木落淮南雨晴雲夢月明風裊自中郎不見  
桓伊去後知辜負秋多少聞道嶺南太守後堂深綠  
珠嬌小綺窓學弄梁州初徧霓裳未了嚼徵含宮泛商  
流羽一聲雲杪為使君洗盡蠻風瘴雨作霜天曉

前調 紀夢

蘇軾

小舟橫截春江臥。看翠壁紅樓起。雲間笑語使君高會。  
佳人半醉危柱哀絃。豔歌餘響。繞雲縈水。念故人老大。  
風流未減。獨回首煙波裏。推枕惘然不見。但空江月。  
明千里。五湖聞道扁舟歸去。仍攜西子雲夢南州武昌。  
南岸昔遊應記。料多情夢裏。端來見我也。參差是。

前調

蘇軾

小溝東接長江柳。堤葦岸連雲際。煙村瀟灑人間一開。

漁樵早市永晝端居寸陰虛度了成何事但綠尊玉藕  
珠杭錦鯉相留戀又經歲因念浮邱舊侶慣瑤池羽  
觴沉醉青鸞歌舞銖衣搖曳壺中天地飄墮人間步虛  
聲斷露寒風細抱素琴獨向銀蟾影裏此懷難寄

前調

秦觀

小樓連苑橫空下窺繡轂雕鞍驟疎簾半捲單衣初試  
清明時候破暖輕風弄晴微雨欲無還有賣花聲過盡  
斜陽院落紅成陣飛鴛鴦玉珮丁東別後悵佳期參

差難又名韁利鎖天還知道和天也瘦花下重門柳邊  
深巷不堪回首念多情但有當時皓月照人依舊

前調

寄無愧丈

晁補之

滿湖高柳搖風坐看驟雨來湖面跳珠濺玉圓荷翻倒  
輕鷗驚散堂上涼生檻邊暑退羅裙零亂想東山謝守  
綸巾羽扇高歌下青天半應記狂吟司馬去年時黃  
花高宴竹枝苦怨琵琶多淚新年鬢換常恐歸時眼中  
物是日邊人遠望隋河一帶傷心霧靄遣離魂斷

前調

別吳興至  
松江作

晁補之

水晶宮繞千家卞山倒影雙溪裏白蘋洲渚詩成春晚  
當年此地行徧瑤臺弄英攜手月嬋娟際筭多情小杜  
風流未覩空腸斷枝間子一似君恩賜與賀家湖千  
峰凝翠黃粱未熟紅旌已遠南柯舊事常恐重來夜闌  
相對也疑非是向松陵回首平蕪盡處在青山外

前調

次韻  
惜春

晁補之

問春何苦匆匆帶風伴雨如馳驟幽葩細萼小園低檻

壅培未就吹盡繁紅占春長久不如垂柳算春長不老  
人愁春老愁只是人間有春恨十常八九忍輕辜芳  
醪經口那知自是桃花結子不因春瘦世上功名老來  
風味春歸時候縱尊前痛飲狂歌似舊情難依舊

前調

晁補之

去年暑雨鉤盤夜闌睡起同征轡今年芳草齊河古岸  
扁舟同檣萍梗孤踪夢魂浮世別離常是念當時綠鬢  
狂歌痛飲今顚顚東風裏此去濟南為說道愁腸不



醒猶醉多情北渚兩行煙柳一湖春水還唱新聲後人  
重到應悲桃李待歸時攬取庭前皓月也應堪寄

前調

中秋

李之儀

晚來輕拂遊雲盡捲霽色寒相射銀潢半掩秋毫欲數  
分明不夜玉琯傳聲羽衣催舞此歡難借凜清輝但覺  
圓月罩影冰壺瑩真無價聞道水晶宮殿蕙爐熏珠  
簾高挂瓊枝半倚瑤觴更勸鶯嬌燕姁目斷魂飛翠縈  
紅繞空冷小砑想歸來醉裏鸞篋鳳朶倩何人卸

前調

柳花

章 藻

燕忙鶯嬾芳殘正堤上柳花飄墜輕飛亂舞點畫青林  
全無才思閒趁遊絲靜臨深院日長門閉傍珠簾散漫  
垂垂欲下依前被風扶起 蘭帳玉人睡覺怪春衣雪  
沾瓊綴繡牀漸滿香毬無數才圓却碎時見蜂兒仰黏  
輕粉魚吞池水望章臺路杳金鞍搖蕩有盈盈淚

前調

梅

孔平仲

歲窮風雪飄零望迷萬里雲垂凍紅綃翦碎凝酥繁綴

煙深霜重疎影沉波暗香和月橫斜浮動悵別來欲把  
芳菲遠寄還羌笛吹三弄 寂寞玉人睡起污殘妝不  
勝嬌鳳盈盈山館紛紛客路相思誰共才與風流賦稱  
清豔多情惟宋筭襄王枉被梨花瘦損又成春夢

前調

梅二首

孔武仲

淡煙池館霜飈蕭條又是年華暮黃花老盡丹楓舞困  
江梅初吐點綴南枝暗傳春信玉苞微露凭危闌望斷  
誰家素臉遙山遠空凝竚 昨夜一枝開處正前村雪

深幽曙看來只恐瑤臺雲散玉京人去庾嶺寒餘漢宮  
妝曉飛堆行雨仗誰人惜取孤芳雅致作春光主

前調

孔武仲

數枝凌雪乘冰嫩英半吐瓊酥點南州故苑何郎遺詠  
風臺月觀疎影橫斜暗香浮動水寒雲晚笑浮花浪蕊  
嬌春萬里空零落愁驚燕遊子寂寥暮景向天邊幾  
回相見玉人纖手殷勤攀贈欲持微盼越使歸來漢宮  
妝罷昭華流怨念湘江夢杳窓前疑是此情何限

前調

周紫芝

黃金雙闕橫空望中隱約三山杳春皇欲降渚煙收盡  
青虹正繞日到層霄九枝光滿普天俱照看海中桃熟  
雲幡絳節冉冉度滄波渺遙想建章宮闕度薰風月  
寒清曉紅鸞影上雲韶聲裏蒙天一笑萬國朝元百蠻  
欵塞太平多少聽堯雲深處人人盡祝似天難老

前調

題夢  
雲軒

周紫芝

楚山千疊浮雲楚雲只在巫山住鸞飛鳳舞當時空記

夢中寄語曉日曛曛夕陽零亂裊紅紫素問如今依舊  
霏霏冉冉知他為誰朝暮玉珮煙鬟飛動炯星眸人  
間相遇嫣然一笑陽城下蔡盡成驚顧蕙帳春濃蘭衾  
日暖未成行雨但丁寧莫似陽臺夢斷又隨風去

前調

梨花

周邦彥

素肌應怯餘寒豔陽占立青蕪地樊川照目靈關遮路  
殘紅斂避傳火樓臺妒花風雨長門深閉亞簾櫳半濕  
一枝在手偏勾引黃昏淚別有風前月底布繁陰滿

園歌吹朱鉛退盡潘妃却酒昭君乍起雪浪翻空粉裳  
縞夜不成春意恨玉容不見瓊英漫好與何人比

前調

晁端禮

倦遊京洛風塵夜來病酒無人問九衢雪少千門月淡  
元宵燈近香散梅梢凍消池面一番春信記南樓醉裏  
西城宴闌都不管人春困屈指流年未幾早驚人潘  
郎雙鬢當時體態而今情緒多應瘦損馬上牆頭縱教  
瞥見也難相認凭闌干但有盈盈淚眼把羅襟搵

前調

李祁

碧山橫繞清湖茂林秀麓波光裏南宮老大西洲漂蕩  
危亭重倚雨步雲行餌風飲露平生遊戲笑此中空洞  
都無一物有神妙浩然氣 埽盡雲南夢北看三江五  
湖秋水狂歌兩解清尊一舉超然千里江漢蒼茫故人  
何處山川良是待白蘋露下青天月上約騎鯨起

前調

寄竹西

呂渭老

五湖春水茫茫夢魂夜逐楊花去汀花岸草佳人微笑



眼波橫注借問劉郎心期則甚一成無據自春來淚滿  
揅藍袖口沒整頓心情處聞道相如病渴念文君白  
頭新句相思兩地光窮煙水一庭花霧錦字藏頭織成  
機上一時分付問他年更有微雲淡月重來分未

前調

呂渭老

年年九月西湖繡船繼日笙簫擁五雲深處紅簾一桁  
語鶯歌鳳羣玉峰頭影娥池畔煙霞飛動認蓬瀛仙子  
雲程路遠貪人世瑤池夢要省黃塵青海戲真珠麻

姑清縱曲門自有菊金芳砌月篴浮棟子著宮桃舞翻  
官柳霞杯纖捧待明年更把西風妙曲按成新弄

前調

上元

向子諲

華燈明月光中綺羅絃管春風路龍如駿馬車如流水  
軟紅成霧太乙池邊葆真宮裏玉樓珠樹見飛瓊伴侶  
霓裳縹緲星回眼蓮微步笑入彩雲深處更冥冥一  
簾花雨金鈿半落寶釵斜墜乘鸞歸去醉失桃源夢回  
蓬島滿身風露到而今江上愁山萬疊鬢絲千縷

前調

西湖  
譙客

葉夢得

對花常欲留春恨，春故遣花飛。早晚來雨，過綠陰深處，幾番芳草。一片飄時，已知消減，滿庭誰埽。料多情也似，愁人易感，先催趁朱顏老。猶有清明未過，但狂風、勿勿難保。酒醒夢斷，年年此恨，不禁煙草。只恐春工應留芳信，與花爭好。有姚黃一朶，殷勤付與，送金杯倒。

前調

楊花  
次章  
質夫韻

李綱

晚春天氣融和乍，驚密雪煙空。墜因風飄蕩，千門萬戶。

牽情惹思青眼初開翠睂纔展小園長閉又誰知化作  
瓊花玉屑共榆莢漫天起 深院美人慵困亂雲鬟儘  
從妝綴小廊回處氍毹重疊輕拈却碎飛入樓臺舞穿  
簾幕總歸流水悵青春又過年年此恨滿東風淚

前調

送林商叟海道還閩中

李綱

際天雲海無涯經從一葉舟中渡天容海色浪平風穩  
何嘗有颶鱗甲千山笙鏞羣籟了無遮護笑讀君佳閨  
追尋往事須信道忘來去 聞說釣鯨公子為才名鶚

書交舉高懷澹泊柏臺蘭省留連莫住萬里閩山不從  
海道寄聲何處悵七年契闊無因握手與開懷語

前調

曾覲

楚天千里無雲露華洗出秋容淨銀蟾臺榭玉壺天地  
參差桂影駕瓦寒生畫檐光射碧梧金井聽昭華半夜  
江梅三弄風嫋嫋良宵永攜手西園宴罷下瑤臺醉  
魂初醒吹簫仙子驂鸞歸路一襟清興鳩鵲樓高建章  
門迴星河耿耿看滄江潮上丹楓葉落浸關山冷

前調

武寧  
瑞蓮

楊无咎

曉來雨歇風生素商乍入鴛鴦浦紅蕖翠蓋不知西帝  
神遊何處羅綺叢中是誰相慕凭肩私語似漢皋珮解  
桃源人去成思憶空凝竚肯為風流令尹把芳心雙  
雙分付碧紗對引朱衣前導應須此去好揖清香盛邀  
佳客杯行無數喚瑤姬並立如花並蒂唱黃金縷

前調

木樨

楊无咎

智瓊嬌額塗黃為誰種作秋風蕊寒香半露綠帷深護

猶聞十里山麝生臍水沉削蠟一時羞避向錢塘江上  
中秋月下有人暗尋遺子不奈書生習氣對羣花領  
略風味騷人已去欲紉幽佩重為湘酹天賦風流友梅  
兄蕙輿桃奴李向明牕斐几纖枝未老眼明如水

前調

梅

楊无咎

當年誰種官梅自開自落清無地一朝驚見危亭岑立  
繁華叢裏知是賢侯有難兄弟素書時寄縱舞攜如意  
吟搔短髮無從訴心中喜却對疎枝冷蕊似於人不

勝風味冰姿斜映朱脣淺破欣然會意青子垂垂翠陰  
密密尤堪頻憩待促歸禁近邦人指點作甘棠比

前調

侯寘

夜來霜拂簾旌深雲麗日開清曉香猊金暝冰壺玉嫩  
佳辰寒早橘綠橙黃袖紅裙翠一堂歡笑正梅妃月姊  
雪肌粉面爭妝點瀟湘好莫惜芳尊屢倒擁羣仙醉  
遊蓬島東牀俊選南溟歸信一時俱到鬢影搖春命書  
紆錦子孫環繞看他時歸去飛觴石澗待甘泉老



前調

旅次登樓作

辛棄疾

楚天千里清秋水隨天去秋無際遙岑遠目獻愁供恨  
玉簪螺髻落日樓頭斷鴻聲裏江南遊子把吳鉤看了  
闌干拍徧無人會登臨意休說鱸魚堪鱠儘西風季  
鷹歸未求田問舍怕應羞見劉郎才氣可惜流年憂愁  
風雨樹猶如此倩何人喚取紅巾翠袖揜英雄淚

前調

文官花

辛棄疾

倚欄看碧成朱等閒褪了香苞粉上林高選匆匆又換

紫雲衣潤幾許春風朝熏暮染為花忙損笑舊家桃李  
東塗西抹有多少淒涼恨 擬倩流鶯說與記榮華易  
消難整人間得意千紅萬紫轉頭春盡白髮憐君儒冠  
曾悞平生官冷筭風流未減年年醉裏把花枝問

前調

過南澗  
雙溪樓

辛棄疾

舉頭西北浮雲倚天萬里須長劒人言此地夜深長見  
斗牛光焰我覺山高潭空水冷月明星淡待燃犀下看  
凭闌却怕風雷怒魚龍慘 峽東蒼江對起過危樓欲

飛還飲元龍老矣不妨高臥冰壺涼簟千古興亡百年  
悲笑一時登覽問何人又卸片帆沙岸繫斜陽纜

前調

辛棄疾

老來曾識淵明夢中一見參差是覺來幽恨停觴不御  
欲歌還止白髮西風折腰五斗不應堪此問北牕高臥  
東籬自醉應別有歸來意須信此翁未死到如今凜  
然生氣吾儕心事古今長在高山流水富貴他年直饒  
來晚也應無味甚東山何事當時也道為蒼生起

前調

辛棄疾

被公驚倒瓢泉倒流三峽詞源瀉長安紙貴流傳一字  
千金爭舍割肉懷歸先生自笑又何廉也但銜杯莫問  
人間豈有如孺子長貧者誰識稼軒心事似風乎舞  
雪之下回頭落日蒼茫萬里塵埃野馬更想隆中臥龍  
千尺高吟纔罷倩何人與問雷鳴瓦釜甚黃鐘啞

前調

別傳  
先之

辛棄疾

只愁風雨重陽思君不見令人老行期定否征車幾輛

去程多少有客書來長安却早傳聞追詔問歸來何日  
君家舊事直須待為霖了從此蘭生蕙長吾誰與翫  
茲芳草自憐拙者功名相避去如飛鳥只有良朋東阡  
西陌安排似巧到如今巧處依然又拙把平生笑

前調

辛棄疾

渡江天馬南來幾人真是經綸手長安父老新亭風景  
可憐依舊夷甫諸人神州沉陸幾曾回首算平戎萬里  
功名本是真儒事君知否况有文章山斗對桐陰滿

庭清晝當年墜地而今試看風雲奔走綠野風煙平泉  
草木東山歌酒待他年整頓乾坤事了為先生壽

前調

題三峰閣詠  
英華女子

韓元吉

雨餘疊巘浮空望中秀色仙都是洞天未鎖人間春好  
玉妃曾墜錦瑟繁絃鳳笙清響九霄歌吹問分香舊事  
劉郎去後知誰伴風前醉回首暝煙千里但紛紛落  
紅如淚多情易老青鸞何許詩成誰寄斗轉參橫半簾  
花影一溪寒水悵飛鳬路杳行雲夢斷有三峰翠

前調

九日  
次韻

袁去華

漢江流入蒼煙戍樓弔古臨無地清霜初肅鷹揚隼擊  
青霄凌厲新鴈聲中夕陽影裏千崖秋氣念東籬采菊  
龍山落帽風流在尚堪繼引滿松醪徑醉誦坡仙臨  
漳宵濟茱萸細看明年誰健空悲身世兒輩何知更休  
說似登山臨水那紛紛毀譽耳邊風過我何曾記

前調

己亥自  
壽二首

劉克莊

年年歲歲今朝左弧懸罷渾無事吾衰久矣我辰安在

老之將至嬾寫京書怕看除目敗人佳思把東籬揜定  
北牕開了悠然酌頽然睡 客有過門投贄道先生訪  
華胥氏誰能辛苦陪他綺語記他奇字屈指前賢戴花  
老監豈其苗裔待異時約取寬夫彥國入耆英會

前調

劉克莊

先生放逐方歸不如前輩抽身早臺郎舊秩看來却似  
散人新號起舞非狂行吟非怨高眠非傲歎終南捷徑  
太行盤谷用卿法從吾好 閉了草廬長嘯後將軍來



時休報牀頭書在古人出處今人非笑製箇閒詞呷些  
薄酒野花簪帽願雲臺任滿又還因任賽汾陽考

前調

自和前  
韻二首

劉克莊

山翁一榻蕭然不知世有歡娛事雀羅庭院載醪客去  
催租人至報荅秋光要些酒量要些詩思奈長鯨罷吸  
寒蛩息響茶甌外惟貪睡窮巷幸無干勢或相遇莫  
知誰氏柴門草戶闕人守舍任伊題字自和山歌國風  
之變離騷之裔待從今去願年年強健插花高會

前調

劉克莊

平生酷愛淵明偶然一出歸來早題詩信意也書甲子  
也書年號陶侃孫兒孟嘉甥子疑狂疑傲與柴桑樵牧  
斜川魚鳥同盟後歸于好除了登臨吟嘯事如天莫  
相諮報田園閒靜市朝翻覆回頭堪笑節物催人東籬  
把菊西風吹帽做先生處士一生一世不論資考

前調

趙彥端

春溪漠漠如空望中只與新愁去何知尚有煙間餘怨

洛津閒賦已瘦難豐久離重見好春如許念海棠未老  
荼蘼欲吐且莫恨風兼雨 休問無情水驛載幽懷小  
橈輕櫓君看睡起平階柳絮入門花霧才盡無奇客殘  
如埽一尊誰舉悵行雲斷後祇應夢裏有澄江句

前調

雪

管鑑

曉來密雪如篩望中瑩徹還如洗梅花過了東君又放  
滿城桃李碎翦瓊英高林低樹巧妝勻綴更江山秀發  
田疇清潤滿眼是豐年意 誰念危樓獨倚共飄零茫

茫天際毫端句澀杯中酒減歡情難寄天為淒涼暫時  
遮盡黃茅白草但神州目斷珠宮玉闕隔三千里

前調

陳亮

鬧花深處層樓畫簾半捲東風軟春歸翠陌平沙草嫩  
垂楊金淺遲日催花淡雲閣雨輕寒輕暖恨芳菲世界  
遊人未賞都付與鶯和燕寂寞憑高念遠向南樓一  
聲歸鴈金釵鬪草青絲勒馬風流雲散羅綬分香翠綃  
封淚幾多幽怨正銷魂又是疎煙淡月子規聲斷

前調

黃機

晴江滾滾東流為誰流得新愁去新愁都在長亭望際  
扁舟行處歌罷翻香夢回呵酒別來無據恨荼蘼吹盡  
櫻桃過了便只恁成孤負須信情鍾易感數良辰佳  
期應誤才高自歎綵雲空詠淩波漫賦團扇塵生吟箋  
淚漬一觴慵舉但丁寧雙燕明年還解寄平安否

前調

海棠

馬莊父

東君直是多情好花一夜都開盡杏梢零落藥闌遲暮

不教寧靜風度秋千日移簾幙翠紅交映正太真浴罷  
西施濃抹都沉醉嬌相稱 磨徧綠牕銅鏡挽青衫不  
堪比並暮雲空谷佳人何處碧苔侵徑睡裏相看酒邊  
凝想許多風韻問因何欠却一些香味惹旁人恨

前調

丙子立  
春懷內

劉鎮

三山臘雪才消夜來誰轉回寅斗試燈簾幙送寒幡勝  
暗香攜手少日歡娛舊遊零落異鄉歌酒到如今生怕  
春來太早空贏得兩眉皺 春到蘭湖少住肯殷勤訪

梅尋柳相思人遠帶圍寬減粉痕消瘦雙燕無憑尺書  
難表甚時回首想畫闌倚徧東風閒却負桃花呪

前調

題連州翼然亭

嚴仁

翼然新榜高亭翰林鐵畫燕公手滁陽盛事何人重繼  
湟川太守太守為誰文章的派醉翁賢胄對千峰削翠  
雙溪注玉端不減瑯琊秀坐嘯清香畫戟聽丁丁滴  
花晴漏棠陰晝寂細賡賓客竹枝楊柳只恐明朝綈封  
趣覲未容借寇儘江山識賞鹽梅事業換青氊舊

前調

題天風海濤  
呈潘料院

嚴仁

颶車飛上蓬萊不須更跨琴高鯉  
劃然長嘯天風瀕洞  
雲濤無際我欲乘桴從茲浮海約  
任公子辨虹竿千丈  
牯鉤五十親點對連鰲餌  
誰榜佳名空翠紫陽仙去  
騎箕尾銀鈎鐵畫龍  
擎鳳峙留人間世更憶東山哀箏  
一曲灑沾襟淚到而今幸有高亭遺愛寓甘棠意

前調

題盱江  
偉觀

嚴仁

城頭傑觀崢嶸重欄下瞰蒼龍脊  
鏤珎盤礎雕檀竦崇



玲瓏金碧華子岡頭麻源谷口神仙窟宅道至今清夜  
月明風冷常隱隱聞笙笛 翠壁煙霞縹緲更寒泉飛  
空千尺數峰江上孤舟天際夕陽紅濕抖擻征塵浩然  
長嘯跨青鸞翼向鳳岡西望遙醺斗酒酌文章伯

前調

登吳  
江橋

毛 玕

渺然震澤東來太湖望極平無際三吳風月一江煙浪  
古今絕致羽化蓬萊胸吞雲夢不妨如此看垂虹千丈  
斜陽萬頃盡倒影青匳裏 追想扁舟去後對汀洲白

蘋風起只今誰會水光山色依然西子安得超然相從  
物外此生終矣念素心空在徂年易失淚如鉛水

前調

茶蘼

盧祖皋

蕩紅流水無聲暮煙細草黏天遠低回倦蝶往來忙燕  
芳期頓嬾綠霧迷牆翠虬騰架雪明香暖笑依依欲挽  
春風教住還疑是相逢晚不是梅妝瘦減占人間丰  
神蕭散攀條弄蕊天涯猶記曲闌小院老去情懷酒邊  
風味有時重見對枕幃空想東牕舊夢帶將離恨

前調

淮西  
重午

盧祖皋

會昌湖上扁舟幾年不醉  
西山路流光又是宮衣初試  
安榴半吐千里江山滿川煙草薰風淮楚念離騷恨遠  
獨醒人去闌干外誰懷古  
亦有魚龍戲舞豔晴川綺  
羅歌鼓鄉情節意尊前同是天涯羈旅綠漲池塘翠陰  
庭院歸期無據問明年此夜一簪新月照人何處

前調

高觀國

舊家心緒如雲乍舒乍卷初無定  
西郊載雨東城隔霧

還開晴景愛踏花陰喜移月地朦朧清影任無心有意  
溶溶曳曳蕭散處有誰問朝暮如今難準枉教他嗔  
春人恨遠峰依舊前蹤何在有時愁凝此興飄然不妨  
吹斷一川煙暝待良宵再入高唐夢裏覓巫陽信

前調

問梅  
劉寺

史達祖

夜寒幽夢飛來小梅影下東風曉蝶魂未冷吾身良是  
悠然一笑竹杖敲苔芒屨踏凍歲常先到傍蒼林却恨  
儲風養月須我輩新詩弔永以南枝為好怕從今逢

花漸老愁消秀句寒回斗酒春心多少之子逃空伊人  
遯世又還驚覺但歸來對月高情耿耿寄白雲杪

前調

雪

史達祖

夢回虛白初生便疑冷月通牕戶不知夜久都無人見  
玉妃起舞銀界回天瓊田易地恍然非故想兒童健意  
生愁霽色情頻在窺簾處一片樵林釣浦是天教王  
維畫取未知授簡先將高興收歸妙句江路梅愁灞陵  
人老又騎驢去過章臺記得春風乍見倚簾吹絮

前調

留別  
社友

史達祖

道人越布單衣興高愛學蘇門嘯有時也伴四佳公子  
五陵年少歌裏眠香酒酣喝月壯懷無撓楚江南每為  
神州未復闌干靜慵登眺今日征夫在道敢辭勞風  
沙短帽休吟稷穗休尋喬木獨憐遺老同社詩囊小牕  
鍼線斷腸秋早看歸來幾許吳霜染鬢驗愁多少

前調

瑞香和朱  
行父韻

方岳

當年睡裏聞香阿誰喚作花間瑞巾飄沉水籠熏古錦

擁青綾被初日酣晴柔風逗暖十分情致掩牕綃待得  
香融酒醒儘消受這春思 從把萬紅排比想較伊更  
爭些子詩仙老手春風妙筆要題教似十里揚州三生  
杜牧可曾知此趁紫脣凝綻芳心半逗與騷人醉

前調

海棠和朱  
行父韻

方岳

晝長庭院深深春柔一枕流霞醉朦朧髮欲醒嬌羞還困  
錦屏圍翠豆蔻初凝櫻桃微綻玉闌同倚記華清浴起  
渭流波暖紅漲膩棄脂水 燕子來時天氣儘韶風與

詩為地芳叢雨歇露痕日  
醖英英仙意莫恨無香最憐  
有韻天然情致待問春能幾  
五更猶是擽今宵睡

御選歷代詩餘卷七十四



欽定四庫全書

御選歷代詩餘卷七十五目錄

一百  
二字

水龍吟

下

張槩

五首

洪璚

方千里

陳以莊

黃昇

吳文英

二首

陳允平

丁宥

周密

三首

王沂孫

張炎

樓扶

汪元量

王易簡

呂同老

練恕可

趙汝鈞

唐珏

趙聞禮

施岳

陳沂孫

葛長庚

王渥

段克己

王惲

白樸

周景

曾允元

薩都拉

張翥  
五首

張埜  
十首

劉基  
三首

趙南星

沈宜修

葉小鸞

前調  
又一體

曹組

前調 又一體

趙長卿

前調 又一體

程垓

吳文英

前調 又一體

吳文英

前調 又一體

趙彥端

前調又一體

辛棄疾

御選歷代詩餘卷七十五目錄



欽定四庫全書

御選歷代詩餘卷七十五

一百  
二字

司經局洗馬掌局事兼翰林院修撰加二級臣王奕清奉

旨校刊

水龍吟

下

水龍吟

次韻虛齋先生  
雨花宴集

張 渠

暮雲低鎖荒臺凭闌四望天垂地  
曼花半夜蜚香繚繞  
昔人曾記往事悠悠物華非舊  
江山仍麗悵斜陽芳草

長安不見共誰灑新亭淚  
開放林蠻舊址動騷人一  
番詞意青油幕裏相忘魚  
鳥水邊雲際却恨清遊未  
能  
追逐區區僚底問何如脫  
了塵埃墨綬為虛齋醉

前調

張 槩

晝長簾幙低垂時時風度  
楊花過梁間燕子片隨香  
觴  
頻沾泥浣苦被流鶯蹴翻  
花影一闌紅露看殘梅飛  
盡  
枝頭微認青青子些兒大  
誰道洞門無鎖翠苔蘚何  
曾踏破好天良夜清風明  
月正須著我閒展蠻牋寄  
情

詞調唱成誰和問曉山亭下山茶經雨早來開麼

前調

次前韻

張 槩

暮天絲雨輕寒寒光春色看看過梅花謝了蒼苔萬點  
香殘粉浣猶喜牆頭一枝嬌裊杏顚微露算幾回逗曉  
朱闌獨倚情只怕東風大 浮世名韉利鎖這區區要  
須識破滄波夜月翠微雲樹依然還我重結鷗盟細聽  
鶯語自歌自和問黃沙飛鏃紅塵走馬又還知麼

前調

碩雪欺春  
次前韻

張 槩

先來花較開遲怎禁風雪摧殘過紅英紫萼從他點綴  
翻成沾泥一點清香幾多穠豔緊藏不露伴楊花散漫  
逡巡堆積纖粟處妝成大 多謝東君造化把羣英一  
朝除破千機錦繡露濃香軟中間坐我嚼徵含商振金  
敲玉塤箎相和問西湖別有一番桃李肯同遊麼

前調

次前  
韻

張 桀

近家添得園亭曉山時看飛雲過擁石栽梅疏池傍竹  
翦除蕪泥更喜南牆杏顙桃臉含羞微露筭鶯花世界

都來十畝規模好何須大 開放兩眉上鎖把春前新  
醅撥破病酒無聊且容觴客無多酌我底用歌喉柳邊  
自有鳴禽相和逗歸來折得花枝教看似人人麼

前調

追和晁次膺

洪璚

經年不見書來後期杳杳從誰問梅英臘小柳枝金嫩  
豔陽春近羅幙風柔泛紅浮綠連朝花信念平生多少  
情條恨葉鎮長使芳心困 可是風流薄命鏡臺前鬢  
鬆餘鬢茜桃凝粉薰蘭漲膩翠愁紅損縱使歸來燈前

月下恐難相認卷重簾顚顚殘妝淚洗把羅襟搵

前調

海棠次周  
美成韻

方千里

錦城春色彩移根麗姿迥歷江南地瓊酥拂臉粉雲滿袖  
羣芳羞避雙燕來時暮寒庭院雨藏烟閉正春眠未足  
宮妝尚怯還輕灑臘脂淚長是歡遊花底怕東風陡  
成怨吹高燒銀燭梁州催按歌聲漸起綠態多慵紅情  
不語動搖人意算吳宮獨步昭陽第一可依稀比

前調

陳以莊

晚來江濶潮平越船吳榜催人去稽山滴翠胥濤濺恨  
一襟離緒訪柳章臺問桃仙浦物華如故向秋娘渡口  
秦娘橋畔依稀是相逢處窈窕青門紫曲舊羅新衣  
翻金縷舊音恍記輕攏慢撚哀絃危柱金屋難成阿嬌  
已遠不堪春暮聽一聲杜宇紅殷綠老雨花風絮

前調

黃昇

少年有志封侯彎弓欲挂扶桑外一朝歛縮蕭然清興  
了無拘礙袖裏陰符枕中鴻寶功名蟬蛻看舌端霹靂

劇談玄妙人間世疑無對  
閬苑醉鄉佳處想當年綠  
英猶在羣仙寄語不須點勘鬼神功罪碧海千尋赤城  
萬丈風高浪快待踞龜食蛤相期汗漫與煙霞會

前調

惠山泉

吳文英

豔陽不到青山古陰冷翠成秋苑吳娃點黛江妃擁髻  
空濛遮斷樹密藏溪草深迷市峭雲一片二十年舊夢  
輕鷗素約霜絲亂朱顏變  
龍吻春霏玉濺煮銀餅羊  
腸車轉臨泉照影清寒沁骨客塵都浣鴻漸重來夜深



華表露零鶴怨把閒愁換與樓前晚色棹滄波遠

前調

吳文英

杜陵新柳狂吟硯波尚濕紅衣露仙桃宴早江梅春近  
還催客句宮漏傳雞禁門嘶馬宦情熱處正黃編夜展  
天香字暝春惹翦紅蜜炬官帽鸞枝碎舞思飄颺  
仙風舉星羅萬卷雲驅千陣飛豪海雨長壽杯深探春  
腔穩江湖同賦又看看便繫金狨鶯曉傍西湖路

前調

化風  
花

陳允平

杜鵑啼老春愁淚痕化作臘脂雨飛花亂點東風枝上  
紅翔翠翥丹穴鳴初碧梧棲未淒涼山塢悵瓊姬夢遠  
玉簫聲斷孤鸞影對誰舞林下風光自許算何心玉  
京瑤圃闌干碎倚遊塵香散芳菲無主經院僧眠月樓  
鐘靜欲飛還駐待青松化盡蒼龍頭角共乘雲去

前調

丁宥

鴈風吹裂雲痕小樓一縷斜陽影殘蟬抱柳寒蛩入戶  
淒音忍聽愁不禁秋夢還驚客青燈孤枕未更深早是

梧桐泣露那更度蘭宵永  
空歎銀鉶金井醉鄉醒溫  
柔鄉冷征塵倦撲閒花漫舞何心管領  
蔥指冰絃蕙懷  
春錦楚梅風韻悵芙蓉城杳藍雲依黯鎖巫峰暝

前調

周密

燕翎誰寄愁籌天涯極望王孫草新煙換柳光風浮蕙  
餘寒尚峭倚杖看雲翦燈聽雨幾番詩酒歎長安倦客  
江南舊恨飛花亂清明後  
堤上斜陽風驟散香綿輕  
沾吟袖麴塵兩岸紋波十里暖蒸香透海闊雲深水流

春遠夢魂難勾問鶯邊按譜花前覓句解相思否

前調

周密

舞紅輕帶愁飛寶鶯暗憶章臺路吟香醉雨吹簫門巷  
飄梭院宇立盡殘陽眼迷晴樹夢隨風絮歎江潭冷落  
依依舊恨人空老柳如許錦瑟年華暗度賦行雲空  
題短句晴絲繫燕么絃彈鳳文君更苦煙水流紅暮雲  
凝紫是春歸去悵江南望遠蘋花自採寄將愁與

前調

白蓮

周密

素鸞飛下青冥舞衣半惹涼雲碎藍田種玉綠房迎曉  
一箇秋意擎露盤深憶君涼夜暗傾鉛水想鴛鴦正結  
梨花好夢西風冷還驚起應是飛瓊仙會倚涼颺碧  
簪斜墜輕妝鬪白明璫照影紅衣羞避露月三更粉香  
千點靜聞十里聽湘絃奏徹冰綃偷翦聚相思淚

前調

白蓮

王沂孫

翠雲遙擁環妃夜涼按徹霓裳舞鉛華淨洗娟娟出浴  
盈盈解語太液荒寒海山依約斷魂何許甚人間別有

冰肌雪豔嬌無奈頻相顧 三十六陂煙雨舊淒涼向  
誰堪訴如今漫說仙姿自潔芳心更苦羅幃初掩玉璫  
還解早淩波去試垂風一葉重來月底與修花譜

前調

白蓮

張炎

仙人掌上芙蓉娟娟猶濕金盤露輕妝照水纖裳玉立  
飄飄似舞幾度銷凝滿湖煙月一汀鷗鷺記小舟夜悄  
波明香遠渾不見花開處 應是浣紗人妒褪紅衣被  
誰輕悞閒情淡雅冶容清潤憑嬌待語隔浦相逢偶然

傾蓋似傳心素怕湘皋珮解綠雲十里捲西風去

前調

梨花

樓扶

素娥洗盡繁妝夜深步月秋千地輕顯暈玉柔肌籠粉  
緇塵斂避霽雪留香曉雲同夢昭陽門閉悵仙源路杳  
曲欄人寂疎雨濕盈盈淚未放遊蜂葉底怕春歸不  
禁狂吹象牀困倚冰魂微醒鶯聲喚起愁對黃昏恨催  
寒食滿襟離思想千紅過盡一枝獨冷把梅花比

前調

淮河舟中夜  
聞宮人琴聲

汪元量

鼓鞀驚破霓裳海棠亭北多風雨歌闌酒罷玉啼金泣  
此行良苦駝背模糊馬頭匝朝朝暮暮自都門燕別  
龍艘錦纜空載得春歸去目斷東南半壁悵長淮已  
非吾土受降城下草如霜白淒涼酸楚粉陣紅圍夜深  
人靜誰宿誰主對漁燈一點羈愁一搦譜琴中語

前調

白蓮

王易簡

翠裳微護冰肌夜深暗泣瑤臺露芳容淡泞風神蕭散  
淩波晚步西子殘妝環兒初起未須勻注看明璫素艷



相逢顚顚當應被薰風悞  
十里雲愁雪妒抱淒涼盼  
嬌無語當時姊妹朱顏褪  
酒紅衣按舞別浦重尋舊盟  
惟有一雙鷗鷺伴玉顏月  
曉盈盈冷豔洗人間暑

前調

白蓮

呂同老

冰肌不汚天真曉來玉立  
瑤池裏亭亭翠蓋盈盈素  
靨時妝淨洗太夜波翻霓  
裳舞罷斷魂流水甚依然舊  
日濃香淡粉花不似人顚  
顚欲喚凌波仙子泛扁舟浩  
波千里只愁回首冰匳半掩  
明璫亂墜月影淒迷露華

零落小欄誰倚共芳盟猶有雙棲雪鷺夜寒驚起

前調

白蓮

練恕可

素姬初宴瑤池珮環誤落雲深處分香華井洗妝湘渚  
天姿淡泞碧蓋吹涼玉冠迎曉盈盈笑語記當時乍識  
江明夜淨只愁被嬋娟誤幾點沙邊飛鷺舊盟寒遠  
迷煙雨相思未盡纖羅曳水清鉛泣露玉鏡臺空銀瓶  
綆絕斷魂何許待今宵試採中流一葉共凌波去

前調

白蓮

趙汝納

淡妝不掃蛾眉為誰佇立羞明鏡真妃解語西施淨洗  
娉婷顧影薄露初勻纖塵不染移根玉井想飄然一葉  
颼颼短髮中流卧浮煙艇 可惜瑤臺路迴抱淒涼月  
中難認相逢還是冰壺浴罷牙牀酒醒步襪空留羽衣  
微褪粉殘香冷望海山依約時時夢想素波千頃

前調

白蓮

唐 珣

淡妝人更嬋娟晚匳淨洗鉛華膩冷冷月色蕭蕭風度  
嬌紅欲避太液池空霓裳舞倦不堪重記歎冰魂猶在

翠輿難駐玉簪為誰輕墜  
別有凌空一葉泛清寒素  
波千里珠房淚濕明璫恨  
遠舊遊夢裏羽扇生秋瓊樓  
不夜尚遺仙意奈香雲易散  
綃衣半脫露涼如水

前調

水仙花

趙聞禮

幾年種玉藍田綠雲翠水烘春暖  
衣薰麝馥韞羅塵沁  
淩波步淺鈿碧搔頭膩黃冰腦參差難翦  
乍聲沉素瑟  
天風珮冷蹁躑舞霓裳徧滿湘浦盈盈月  
抱相思夜  
寒腸斷含香有恨招魂無路  
瑤琴寫怨幽韻淒涼暮江

空渺數峰清遠絮迎風一笑持花酹酒結南枝伴

前調

施岳

翠輦湧出滄溟影橫棧壁迷煙墅樓臺對起攔干重凭  
山川自古梁苑平蕪汴堤疏柳幾番晴雨看天低四遠  
江空萬里登臨處分吳楚兩岸花飛絮舞度春風滿  
城簫鼓英雄暗老曉潮昏汐歸帆過櫓淮水東流塞雲  
北度夕陽西去正淒涼望極中原路杳月來南浦

前調

金鳳花

陳沂孫

階前砌下新涼嫩姿弱質婆娑小仙家甚處鳳雛飛下  
化成窈窕尖葉參差柔枝裊娜體將玉造自川葵放後  
堂萱謝了是園苑無花草自恨西風太早逞芳容紫  
團緋繞管裏低昂篋頭約掠空成懊惱圓胎結就小鈴  
垂下直開臨曉向凡間謫墮不知西帝曾關宸抱

前調

葛長庚

雲屏漫鎖空山寒猿啼斷松枝翠芝英安在木苗已老  
徒勞展齒應記洞中鳳簫錦瑟鎮常歌吹悵蒼苔路香

石門信斷無人問溪頭事  
回首暝煙無際但紛紜落  
花如淚多情易老青鸞何處書成難寄欲問雙蛾翠蟬  
金鳳向誰嬌媚想分香舊恨劉郎去後一溪流水

前調

從商師國器  
獵同裕之賦

王渥

短衣匹馬清秋慣曾射虎南山下西風白水石鯨鱗甲  
山川圖畫千古神州一時勝事實僚儒雅快長堤萬弩  
平岡千騎波濤卷魚龍夜落日孤城鼓角笑歸來長  
圍初罷風雲慘淡貌貅得意旌旗閒暇萬里天河更須

一洗中原兵馬看鞭橐鳴咽咸陽道左拜西還駕

前調

壽舍弟  
菊軒

段克己

天高秋氣初清姑汾山水增明秀黃花紅葉輸香泛豔  
恰過重九細捻金甌旋題新句滿斟芳酒況人生自有  
安排去處須富貴何時有休說山中宰相也不效斜  
川五柳鉏犂自把山田耕罷雙牛隨後經史傳家兒孫  
滿眼漸能承愛待與君坐閱莊椿歲月作睹然叟

前調

賦秋日  
紅梨花

王惲



纖芭淡貯幽香玲瓏輕鎖秋陽麗仙根借暖定應不待  
荆王翠被瀟灑輕盈玉容渾是金莖露氣甚西風宛轉  
東欄暮雨空點綴真妃淚誰遣司花妙手又一番角  
竒爭異使君高卧竹亭閒寂故來相慰燕几螺屏一枝  
披拂繡簾風細約洗妝快瀉玉鉶芳酒枕秋蟾醉

前調

維陽途  
中值雨

白 撲

短亭休唱陽關柳絲惹盡行人怨鴛鴦隻影枯荷蒂淡  
沙寒水淺紅綬雙銜玉簪中斷苦難留戀更黃花細雨

征鞍催上青衫淚一時減 回首孤城不見點秋空去  
鴻一線情緣未了誰教重賦春風人面鬪草閒庭采香  
幽徑舊曾行徧謾今宵酒醒無言有恨恨天涯遠

前調

周景

人生能幾相逢百年四海為兄弟舊時青眼今番白髮  
年華隕涕春更無情拋人先去楊花無蒂況江程漸短  
別期漸緊須重把蘭舟繫 幸自清江如砥指黃壚流  
鶯聲細滄波如許平蕪何處明朝迢遞何預興亡不如

休去牆陰挑薺且相期共看蓬萊清淺更三千歲

前調

春夢

曾允元

日高深院無人榴花撲帳春雲暖回文未就停鍼不語  
繡牀倚徧翠被籠香綠鬟墮膩傷春成倦儘雲山煙水  
柔情一縷又暗逐金鞍遠鸞珮相逢甚處似當年劉  
郎仙苑凭肩後約畫眉新巧從來未慣枕落釵聲簾開  
燕語風流雲散甚依稀難記人間天上有緣重見

前調

贈友

薩都拉

王郎錦帶吳鉤醉騎赤鯉銀河去絳袍弄月銀壺吸酒  
錦箋揮兔禿鬢西風短篷落月東吳西楚悵丹陽郭裏  
相逢較晚共翦燭西牕雨 文采風流俊偉碧紗巾挂  
珊瑚樹出門萬里掀髯一笑青山無數揚子江頭凍沙  
寒雨暮天飛鷺待明朝酒醒金焦繫楫過瓜洲渡

前調

傅淵道宅  
賞紫牡丹

張翥

紫雲何處飛來仙家別有藏春洞刻繒紋綉鏤檀色膩  
熏臍香重穀雨初晴榆煙新換棟花微動是花姑養就

韓仙染出還分與人間種  
好與密遮繡幄護玉環三  
生妖夢只愁今夜綠叢月老朱房露凍便喚秋娘重澆  
卯酒緩歌低送倩紅鸞與約韶華少住作尊前供

前調

次韻王本中  
賦樓子芍藥

張翥

寶樓十二玲瓏仙家只在雲間住金槃舞罷羅裙襞皺  
乘風欲去畫檻移香彩鸞銜信幾番延佇看釵邊疊萼  
天然富貴妝臺近有人妒勾引廣陵遺恨倩流鶯為  
花低訴年年長是芳菲時候滿城煙絮春色三分落紅

千片總成塵土向月明空羨雙雙睡蝶宿花房露

前調

廣陵送客  
賦琴花

張翥

芙蓉老去妝殘露花滴盡珠盤淚水天瀟灑秋容冷淡  
憑誰點綴瘦葦黃邊疎蘋白外滿汀煙樾把餘妍分與  
西風染就猶堪愛紅芳媚幾度臨流送遠向花前偏  
驚客意船牕雨後數枝低入香零粉碎不見當年秦淮  
花月竹西歌吹但此時此處叢叢滿眼伴離人醉

前調

蠟梅

張翥

玉人相貌堪憐曉妝一洗鉛華盡此花應是菊分顏色  
梅分風韻萼點酡酥口攢金磬心凝檀粉甚女貞染就  
仙衣絕勝蜂兒重鵝兒嫩 說與玉龍莫品怕宮波一  
般流恨故人堪寄折枝代取江南春信沉水全熏藥絲  
密綴額黃深暈乍燕姬未識是花是蠟笑俚人問

前調

聽房自然  
歌為賦

張翥

春風瓊樹香中數聲恰似流鶯轉歌塵飛下落花起舞  
驪珠脫串豆蔻珠簾牡丹雪嶺小桃人面是自然絕藝

天然畫譜霓裳序六么偏 獨占二分月色向尊前幾  
番曾見賞音如此不辭醉墨為題紈扇浪雨閒雲剩香  
殘黛莫論恩怨看穠花又老情緣未斷寄樓中燕

前調

咏遊絲

張堃

落花天氣初晴隨風幾縷來何處飄飄冉冉悠悠漾漾  
欲留還去雪繭新抽青蟲暗墜檐珠輕度看垂虹百尺  
縈迴不下似欲繫春光住 憑仗何人收取付天孫雲  
綃機杼浮蹤浪跡忍教長伴章臺飛絮惹起閒愁織成



離恨萬頭千緒望天涯盡日柔情不斷又聞庭暮

前調

題湖山  
勝槩亭

張 埜

翠微曾共登臨冷光潋灩波千頃玉京佳處景雖天造  
地因人勝若把西施淡妝濃抹兩相比並得此間如對  
姮娥仙子慵梳掠臨鸞鏡  
滿意曲欄芳徑早安排兩  
蓬煙艇茶甌雪卷紋楸電響醉魂初醒湖海高情林泉  
清意幾人能領算知音只有中宵涼月浸蓬萊影

前調

遊錢塘  
西山

張 埜

一鞭空醉煙霏笑談已到山深處丹崖翠壁野猿幽鳥  
冷泉高樹兜率天中蓬壺境內偶成佳寓正捫參歷井  
窮探未了回首早踈鐘暮 畫舸亭亭橫渡醉歸來被  
誰留住雲牕霧閣羣仙應笑塵緣相誤白雪歌殘青鸞  
夢覺滿身風露料明年却向 百臺高處憶桃源路

前調

和馬西  
麓韻

張 埜

故人邂逅相逢滿懷和氣渾無際別來一載光陰回首  
水流星墜白雪歌詞青雲人物知音有幾把滄溟倒卷

天瓢滿吸須拚了為君醉  
醉眼曹騰不寐直望斷長  
空萬里風清霧冷乾坤似畫  
月華如洗夢裏遨遊蕊珠  
宮殿飄然得意到醉來有句  
且休拈出怕驚人世

前調

登滕王閣

張 栻

畫檐聳翠凌霄暮雲還送西山雨  
千年陳跡一時勝槩  
東南賓主佩玉鳴鑾西風吹入江聲  
柔櫓謾登臨贏得  
征鞍倦客離思亂鄉心苦  
一夢繁華何許空留得悲

涼今古雄文健筆星輝日映鬼呵神  
護倚徧闌干有心

也待題留新句見一雙白鷺蒼煙影裏背人飛去

前調

暇日過田  
學士村居

張堃

翠凝冷浸清溪洞天惟許仙家住主人新葺柳亭梅塢  
竹軒松戶綠野風煙東山泉石少人知處怕椿翁早晚  
急流勇退田園記已成趣不戀鑾坡玉署要管領東  
臯朝暮君應解得風波何限功名良苦琥珀醅濃玻瓈  
盞大醉扶歸路料沙頭鷗鷺也應笑我却匆匆去

前調

飲劉氏春野  
亭用前韻

張堃

夢回花露沾衣夜深酩酊誰留住依稀猶記春風亭檻  
野雲牕戶物外仙姿一聲白雪翠凝深處要風流陶寫  
等閒莫遣兒童輩識真趣 四海知音難遇儘疎狂暝  
煙催暮一杯未舉兩眉長皺人生何苦只恐明朝玉驄  
迷卻武陵溪路倘劉郎不厭醒時來訪醉時歸去

前調

重九登高  
峯寄柳湯佐

張堃

重陽何處登臨玉驄慣試南山路秋空絕頂西風兩鬢  
白雲雙屨浙浦寒潮蘇堤畫舸吳宮煙樹不一尊瓊液

數聲金縷將此景成虛負 試覓舊題詩句早爛斑雨  
苔無數瓊泉寶瑟不堪重記泛觴流羽笑撚黃花閒尋  
紅葉故人何處倚危闌北望燕雲掩靄又征鴻暮

前調

咏杏  
花

張 埜

雪香飛盡江梅上林桃李寒猶緊牆頭驚見枯枝闌簇  
生紅初噴嫩柳亭臺新晴巷陌清明相近甚等閒勾引  
狂蜂戲蝶早不管人春困 不怕蠟痕輕褪怕東風亂  
飄殘粉瑣牕猶記雙鵝細翦一簪幽恨駿馬如飛流光

似箭歸期難準料黃昏凝雨盈盈如淚把臙脂溫

前調

醉辛稼軒墓

張堃

嶺頭一片青山可能埋沒淩雲氣遐方異域當年滴盡  
英雄清淚星斗撐腸雲煙盈紙縱橫遊戲漫人間留得  
陽春白雪千載下無人繼不見戟門華第見蕭蕭竹  
枯松悴問誰料理帶湖煙景瓢泉風味萬里中原不堪  
回首人生如寄且臨風高唱逍遙舊曲為先生醉

前調

夜聞銅瓶湯響

劉基

玉釭開盡丹葩畫檐深宿蟾蜍影門掩清宵聲來何處  
堂空人靜如竹梳風如荷遇雨如泉發并向羅幃細細  
如歌如語還如暗蟲相命 繡被熏沉正暖夢雲車紫  
鵲雙並洞庭曠野九韶齊奏殷天笙磬別有蛾眉鼓琴  
彈瑟江鳴山應待脩然睡覺燈存餘地雞啼牕炯

前調

吹簫曲用  
東坡韻

劉基

秦臺人去無蹤空餘綠樹連天表瑤京路遠緱山夜永  
離愁縈繞露咽秋蟬霜淒白鶴月寒煙裊想孤鸞舞罷



碧桃花盡長是怨多歡少  
夢裏駟車過處見蒼梧九  
峰青小脩篁染淚滄江流  
恨年年不了廣莫風悲昭  
華玉冷聲沉雲杪又扶桑  
日上靡萍光散蓮池春曉

前調

和東坡韻

劉基

雞鳴風雨蕭蕭側身天地  
無劉表啼鵲迸淚落花飄  
恨斷魂飛繞月暗雲霄星  
沉煙水角聲清裊問登樓  
王粲鏡中白髮今宵又添  
多少極目鄉關何處渺青  
山髻螺都小幾回好夢隨  
風歸去被渠遮了寶瑟絃  
僵玉笙

簫冷冥鴻天杪但侵堦莎草滿庭綠樹不知昏曉

前調

楊花

趙南星

春閨忒恁愁人已看盡落紅翻墜楊花更慘映日連空  
撩人情思飛過高城尋來小院從教門閉偶蘋風乍定  
商量暫住低飛燕還扶起何物疑花亂玉幾曾堪髻  
簪衣綴蘭閨人倦多愁牽夢難成易碎小玉聲喧晴天  
雪下香堦無水憶遼西何處神魂蕩漾暗拋紅淚

前調

明媛

沈宜修

石城潮打千秋消磨不盡還相逗閒雲無定野水長縈  
繽紛繞岫古古今今朝朝暮暮如何參透歎依然風景  
茫茫交集但憑得秋容瘦 看取嬋娟秋色西風搖落  
應憐否碧天空闊寒煙無數怨砧淒漏把杯邀月恨濃  
愁極拚他中酒問廣寒丹桂飄殘何處斷香盈袖

前調

明媛  
葉小鸞

晝長人靜沉沉綠楊正媚深深院畫簾低映薄羅無暑  
汗消珠釧蘭畹香清湘筠影瘦翠陰遮徧聽蓮歌處處

悠揚逸韻半入水風煙片 一霎雨餘明淨晚雲如黛  
花如鈿舟移萍亂芳香袖惹媚風輕扇一色紅妝千重  
翠蓋參差江面更堪憐歸路平波杳杳夕陽斜見

前調

又一體  
牡丹

曹組

曉天穀雨晴時翠羅護日輕煙裏醺醺徑暝柳花風淡  
千葩濃麗三月春光上林池館西都花市看輕盈隱約  
何須解語凝情處無窮意 金殿筠籠歲貢最姚黃一  
枝嬌貴東風既與花王芍藥須為近侍歌舞筵中滿裝

歸帽斜簪雲髻有高情未已齊燒絳蠟向闌邊醉

前調

又一體  
咏雲

趙長卿

先來天與精神更因麗景添殊態拖輕冉冉纔凝一段  
還分五綵畢竟非煙有時為雨惹晴無奈道無心怎被  
歌聲遏斷遲遲向青天外宜伴先生醉臥得饒到和  
山須買也曾惱煞襄王誰道依前不會我欲乘歸去翻  
恨悵帝鄉何在念佳期未展天長暮合儘空相對

前調

又一體

程垓

夜來風雨匆匆故園定是花無幾愁多愁極等閒辜負  
一年芳意柳困桃慵杏青梅小對人容易算好春長在  
好花長見元只是人顚顚 回首池南舊事恨星星不  
堪重記如今但有霜花老眼傷情清淚不怕逢花瘦只  
愁怕老來風味待繁紅亂處留雲借月也須拚醉

前調

壽嗣  
榮王

吳文英

望中璇海波新信槎又匝銀河轉金風細裊龍枝聲奏  
鈞簫秋遠南極飛仙夜來催駕祥光重現紫霄承露掌

瑤池蔭密蟠桃秀螽蓮綻  
新棟晴雲凌漢早涼生蘭  
繁書卷繡裳五色昆臺十二香深簾捲花萼樓高處連  
清曉千秋傳宴賜長生玉宇鸞迴鳳舞下蓬萊殿

前調

又一體 用  
見山韻餞別

吳文英

夜分溪館漁燈巷聲乍寂西風定河橋送遠玉簫吹斷  
霜絲舞影薄絮秋雲澹蛾山色宦情歸興怕煙江渡後  
桃花又泛宮溝上春流緊  
新句欲題還省透香煤重  
箋悞隱西園已負林亭移酒松泉薦茗攜手同歸處玉

奴喚綠牕春近想驕驄又踏西湖二十四番花信

前調

又一體  
雨

趙彥端

淡煙輕霧濛濛望中乍歇凝晴晝纔驚一霎催花還又  
隨風過了清帶梨梢暈含桃臉添春多少向海棠點點  
香紅染徧分明是胭脂透無奈芳心滴碎阻遊人踏  
青攜手檐頭線斷空中絲亂纔晴却又簾幙中間垂處  
輕風送一番寒峭正留君不住瀟瀟更下黃昏後

前調

又一體  
咏瓢泉

辛棄疾



聽兮清珮瓊瑤些明兮鏡秋毫些君無此去流昏漲膩  
生蓬蒿些虎豹甘人渴而飲汝寧猿猱些大而流江海  
覆舟如芥君無助狂濤些路險兮山高些予塊獨處  
無聊些冬槽春盎歸來為我製松醪些其外芬芳團龍  
片鳳煮雲膏些古人兮既往嗟予之樂樂簞瓢些



欽定四庫全書

御選歷代詩餘  
卷七十五

御選歷代詩餘卷七十五